

Evening Dogri (NSD)

16-04-2025

खबरां

1. सुप्रीम कोर्ट नै वक्फ कनून पर अंतरिम फैसला रोकेआ, केंद्र कोला मंगी प्रतिक्रिया, कल सुनवाई होग।
2. मुख् न्याधीश खन्ना हुंदे न्यायधीश बी.आर गवई हुंदे नां दी सिफारिश अगले मुख् न्याधीश दे ओहदे आस्तै कीती।
3. प्रधानमंत्री मोदी ते फिनलैंड दे राष्ट्रपति हुंदे वैश्विक मुद्दे ते आपसी सांझेदारी गी मजबूत बनाने बारे कीती गल्लबात।
4. छत्तीसगढ दे बस्तर च सुरक्षा बलें कन्नै टाकरे च मारे गे 2 माओवादी।
5. अमरीका नै चीन थमां आयात होने आहली चीजें पर 245 प्रतिशत तगर दे नमें जवाबी शुल्कें दी घोषणा कीती ऐ।
6. रेलवे मंत्री होरें भारत दी पहली रेल जात्तरा दी 172मीं बरेगंड मनाई।

<><><><><><>

SC-Waqf Law

सुप्रीम कोर्ट नै अज्ज नमें वक्फ कनून बारे अंतरिम फैसले पर रोक लाई दिती ऐ। एह रोक केंद्र तरफा त्रै नुख्तें पर दलीलां तैयार करने आस्तै मता समें मंगे जाने दे बाद लाई गई ऐ। सुप्रीम कोर्ट एहदी सुनवाई कल करोग। मुख् न्याधीश संजीव खन्ना ते न्यायधीश संजय कुमार ते के.वी विश्वनाथ हुंदी पीठ नै सालीसीटर जनरल तूषार मेहता होरें गी पुच्छेआ जे कई सारे ऐसे लोग बी होंगन जिंदे कोल वक्फ दी संपत्तियां रजिस्टर करवाने लेई लोडचदे दस्तावेज नेई होंगन तां इस सरबंध्यै च कीती गेदी तरमीम गी कियां लागू कीता जाग। उआं अदालत आसेआ सुझाया गेदा ऐ जे अंतरिम आदेश अज्ज पास नेई होई सकेआ ते अदालतै अखीर च फैसला लैता ऐ जे इस मामले पर दलीलां कल बी जारी रक्खियां जांगन।

<><><><><><>

CJI-GAVA

भारत दे मुख न्याधीश संजीव खन्ना होरें अगले मुख न्याधीश आस्तै न्याधीश बी.आर गवाई हुंदे ना दी सिफारिश कीती ऐ। न्याधीश गवाईहोर सुप्रीम कोर्ट दे दुए वरिष्ठ न्याधीश न ते उन्दे नां दी सिफारिश केंद्र कनून मंत्रालय तरफा कीती जारदी ऐ। मौजूदा मुख न्याधीश खन्ना हुंदा कार्यकाल अगले म्हीने दी 13 तरीक गी खत्म होआ रदा ऐ।

<><><><><><>

India-Uzbekistan

भारत-उज्बेकिस्तान संयुक्त सेना अभ्यास .. दा 6मां संस्करण अज्ज पुणे दे आयूंध च विदेश प्रशिक्षण .. च शुरू होआ। 60 ते भारती दल च जाट रेजीमेंट दी इक बटालियन शामिल ही। उज्बेकिस्तान दल दा प्रतिनिधित्व देश दी सेना नै कीता। रक्षा मंत्रालय दा आखना ऐ जे संयुक्त अभ्यास इक सालाना प्रशिक्षण कार्यक्रम ऐ जेड़ा बारी-बारी भारत दे उज्बेकिस्तान च कराया जंदा ऐ। एहदे कन्नै दवें धड़ें गी बेहतरीन कम्में बारै जानकारी सांझा करदे दा मौका मिलदा ऐ। कन्नै गै रखा दे खेत्तर च आपसी सहयोग ते दपक्खी सरबंधें च सकरात्मक बाधा होग। एह प्रशिक्षण कार्यक्रम 28 अप्रैल तोड़ी चलोग।

<><><><><><>

PM-Visit

कश्मीर थमां कटड़ा बश्कार रेल सेवा दा 19 अप्रैल गी प्रधानमंत्री नरेंद्र मोदी हुंदे आसेआ उद्घाटन कीता जाना हा, पर हून इस कार्यक्रम गी अगड़ा पाई दित्ता गोआ ऐ। एह बदलाव मौसम विभाग आसेआ 18 थवां 19 अप्रैल बश्कार जम्मू-कश्मीर च भारी बरखा ते खराब मौसम दे चलदे कीता गोआ ऐ। रेलवे मंत्रालय नै सोशल मीडिया दी इक पोस्ट च इस बारै जानकारी दित्ती ते आखेआ जे अगली तरीक बारै जानकारी तौले गै दित्ती जाग। इत्थे एह दस्सना लाजमी ऐ जे प्रधानमंत्री नरेंद्र मोदी हुंदे आसेआ उधमपुर-श्रीनगर-बारामूला लिंक दे खीरी सैक्शन दा उद्घाटन कीता जाना हा।

<><><><><><>

Modi-Finland President

प्रधानमंत्री नरेंद्र मोदी होरें फिनलैंड दे राष्ट्रपति अलेक्जेंडर स्टब हुंदे कन्नै अज्ज फोन पर गल्लबात कीती। इस दौरान दौनें नेताएं क्षेत्रीय ते वैश्विक मुद्दें सने यूक्रेन दे हालात पर चर्चा कीती। दौनें धड़ें डिजिटलीकरण, टिकाउ विकास ते लोकें दी आओजाई गी सखल्ला बनाने

बारै दौनें देशें बश्कार चला रदे तालमेल दा आंकलन कीता। क्वांटम, 5जीए 6जी, आर्टिफिशल इंटेलीजेंस ते साइबर सुरक्षा दे खेत्तरे च सांझेदारी बदाने पर दौनें देशें सहमति जताई। मोदी होरें आखेआ जे फिनलैंड यूरोपीय संघ दा महत्वपूर्ण सांझेदार ऐ।

<><><><><><>

Maoists-Killed

छत्तीसगढ़ दे बस्तर च सुरक्षाबलें कन्नै टाकरे दौरान 2 माओवादी मारे गे। इन्दे कोल 13 लक्ख रपे दे नोटें दी गड़ियां हियां। आई.जी.पी बस्तर सुंदर राज पी होरें आखेआ जे कोंडागांव ते नारायणपुर जिलें दे बन्ने कन्नै लगदे ग्राएं किलम बारगुम दे जंगलें च कल शामी झड़प्फ शुरू होई। उसलै जिला रिजर्व गार्ड दा दल गश्त करारदा हा। अजे तोड़ी 2 माओवादिएं दी लोथां ते 1 ए.के 47 रफल, दुए हथियार ते असला टाकरे आहली थाहरा थमां बरामद होआ ऐ। तपाशी अभियान अजें बी जारी ऐ।

<><><><><><>

WHO-Agreement

वर्ल्ड हेल्थ आर्गनाइजेशन विश्व सेहत संगठन दे सदस्य मुल्खें दुनिया गी आने आहले माड़े हालात पेंडामिक्स बारै तैयार करने आस्तै इक ऐतिहासिक समझौता पत्र तैयार कीता ऐ जेड़ा अगले त्रै बरें तोड़ी लागू रौहगा। इस समझौते तहत तकनीकी स्थानंतरन पर कनून लागू करना, लाइसेंस समझौता ते सेही माली हालात पैदा कीते जांगन। एहदे च पेंडामिक थमां बचाव आस्तै इक सेहत दृष्टिकोण ते पूरी दुनिया च वैश्विक आपूर्ति तंत्र स्थापित कीता जागा। एह प्रस्ताव मंजूरी आस्तै विश्व सेहत सभा दे अगले-अगले म्हीने पेश कीता जागा।

<><><><><><>

Road-Safety Schools

केंद्री शिक्षा मंत्रालय शिड़क, परिवहन ते जरनैली शिड़कें सरबंधी मंत्रालय कन्नै रलिए शिड़क सुरक्षा अभियान गी पूरे देश दे स्कूलें तोड़ी पुजाने आस्तै कम्म करोग। इक सोशल मीडिया पोस्ट च शिक्षा मंत्री धर्मेन्द्र प्रधान होरें आखेआ जे शिड़क हादे ते असुरक्षित तरीके कन्नै गड़ुी चलाना पूरी दुनिया च कई जिंदगिएं गी जोखिम च पांदी ऐ। उनें आखेआ जे शिड़क सुरक्षा दे सरबंध च मंत्रालय जागरूकता बदाने बारै कम्म करोग जेदे च स्कूली शिक्षा प्रणाली दी मदद लैती जागा।

<><><><><><>

Central Railway ATM

इक पहलकदमी तैहत केंद्री रेलवे नै मुम्बई मनमड पंचवटी एक्सप्रेस दे अंदर एटीएम शुरू कीता ऐ। केंद्री रेलवे मंत्री अश्विनी वैष्णव होरें अपने अधिकारिक एक्स अकाउंट उप्पर इक वीडियो सांझा कीता जेदे च इक यात्रु बैंक ऑफ महाराष्ट्र एटीएम दा इस्तेमाल करदे होई दस्सेआ गेआ। आकाशवाणी समाचार कन्नै गल्लबात करदे होई केंद्री रेलवे दी मुखब जनसंपर्क अधिकारी स्वपनिल नीला होरें आखेआ जे तकनीकी परिपेक्ष दा आंकलन करने दे बाद इस सुविधा गी दुइएँ रेल गड्डिएँ तोड़ी बदाया जाग।

<><><><><><>

Search-Operation

पुंछ जिले दी सुरनकोट तैहसील दे लसाना ग्रांड च अज्ज उप्परोतली त्रीये ध्याड़े बी सुरक्षाबलें आसेआ बड्डे स्तरै पर चलाया गेदा सांझा तुपाई अभियान बरोबर जारी ऐ। जंदे सोमवारें इलाके च मुश्तवा आतंकवादिएं कन्नै होई दी गोलीबारी दे मगरा सुरक्षाबलें आसेआ एहू अभियान रम्भेआ गेआ हा। तदू थमां गै इलाके च फौज ते पुलस दे जवानें दी मजूदगी बधाई दिती गेदी ऐ ते उ'नेंगी हाईअलर्ट पर रक्खेआ गेदा ऐ। घने जांगली इलाके च छप्पे दे आतंकवादिएं दा पता लाने लेई ड्रोन दी मदाद कन्नै इलाके गी खंगालेया जा'रदा ऐ।

<><><><><><>

SC-Stay

सुप्रीम कोर्ट नै मंगलवारें जम्मू-कश्मीर ते लद्दाख हाई कोर्ट दे उस हुक्मै पर रोक लाई दिती ऐ जेदे च राश्ट्रीय जरनैली शिड़क एन.एच-44 पर टोल टैक्स च 80 प्रतिशत दी कमी कीती गेई ही। हाई कोर्ट नै पैहले एहू फैसला सनाया हा जे सड़क निर्माण दा कम्म अजें बी पूरा नेई होने पर टोल टैक्स वसूलना जायज नेई ऐ। जस्टिस अभय एस. ओका ते जस्टिस उज्जवल भुयान दी पीठे कल भारतीय राश्ट्रीय जरनैली शिड़क प्राधिकरण एनएचए-1 आसेआ दायर इक अर्जी पर सुनवाई करदे होई खीरी हुक्म पास कीता। अगली तरीक 19 मई 2025 पाई गेई ऐ।

<><><><><><>

CJ Palli Oath

न्यायधीश अरूण पल्ली होरें अज्ज जम्मू-कश्मीर ते लद्दाख हाई कोर्ट दे मुख्वा न्यायधीश दे तौरा पर संगंध लैती। उनेंगी उपराज्यपाल मनोज सिन्हा होरें इक कार्यक्रम दौरान संगंध दोआई। संगंध समारोह च मुख्वामंत्री उमर अब्दुल्ला, हाईकोर्ट दे जज ते होर दुए मन्ने-परमन्ने दे लोक शामिल होए। हिमाचल प्रदेश हाई कोर्ट दे मुख्वा न्यायधीश बी इस मौके पर मौजूद हे।

<><><><><><>

US Terrif-China

अमरीका नै चीन थमां आयात होने आहली चीजें पर 245 प्रतिशत तगर दे नमें जवाबी शुल्कें दी घोषणा कीती ऐ। एहदे नै दोनो देशों बश्कार बपार संघर्ष तेजी कन्नै बदी गेआ ऐ। अमरीकी राष्ट्रपति हुंदे कार्यालय व्हाइट हाउस दे बयान च आखेआ गेआ ऐ जे एहू कदम राष्ट्री सुरक्षा गी ध्यानै च रखदे होई बेहतर ऐ। बयान च चीन आसेआ ठोआए गेदे कमदे दा बी उल्लेख ऐ। इन्दे च चीन आसेआ गैलियम, जरमेनियम, एंटीमनी ते सामरिक महत्व दे होरनें पदार्थें दे निर्यात पर प्रतिबंध लाना शामिल ऐ। चीन आसेआ भारी दुर्लभ धातुएं ते चुम्बक समेत महत्वपूर्ण उच्च तकनीक पदार्थें पर निर्यात प्रतिबंधित कीते जाने दे फैसले कन्नै अमरीका दे ऑटोमोटिव, एयरोस्पेस, सेमीकंडक्टर ते रक्षा जेहे क्षेत्रें पर असर पौगा। चीन दे विदेश मंत्रालय दे प्रवक्ता लिन जियान नै आखेआ ऐ जे शुल्क युद्ध अमरीका नै शुरू कीता ऐ। लिन होरें आखेआ जे चीन दी जवाबी कार्रवाई पूरी चाल्ली उचित, वैध ते अपने देश दे अधिकारें दी रक्षा ते अंतरराष्ट्रीय बपार च ईमानदारी बनाए रखने आस्तै ऐ। प्रवक्ता होरें गलाया जे अमरीका सेई मायने च गल्लबात दे जरिए मुद्दा सुलझाना चाहंदा ऐ ते उसी बड़ा मता दबाव बनाना, धमकी देना ते ब्लैकमेलिंग करना छोड़ियै समानता, सम्मान ते आपसी लाहू दे आधार पर चीन कन्नै गल्लबात करनी होगी।

<><><><><><>

Indian-Railways

रेल मंत्री अश्विनी वैष्णव होरें अज्ज भारत दी पहली रेल जात्तरा दी 172मीं बरेगंड मनाई ते पहली रेल जेड़ी बोरी बुंदर थमां थाणे, महाराष्ट्र बश्कार चलाई गई ही, दे ऐतिहासिक पल गी चेत्ता कीता गेआ। एहू रेल 16 अप्रैल 1853 गी शुरू कीती गई ही। इक सोशल मीडिया पोस्ट च मंत्री होरें अज्ज दे ध्याड़े गी भारत दे इतिहास च बड़ा महत्वपूर्ण दस्सेआ जिसी भारती रेलवे दा जन्म ध्याड़ा बी आक्खी सकदे ना। उनें आखेआ जे इस दिन पहले छुट्टी

घोषित कीती गई ही। सालें पैहले दी ऐतिहासिक यात्रा दे ब्यौरे गी चेत्ता करदे होई वैष्णव होरें दस्सेआ जे रेल गड्डी च 14 डब्बे हे जेदे च 400 सहे दे यात्रु सवार हे। रेल गी त्रै इंजनें सिंध, सुल्तान ते साहेब नै चलाया हा ते 34 किलोमीटर दा दायरा 1 घंटा 15 मिनटें च पूरा कीता हा। भारतीय रेलवे दी परम्परा गी उजागर करदे होई मंत्री होरें आखेआ जे पैहले सफर थमां लेइयै देश दी सेवा आस्तै भारती रेलवे नै अपनी बचनबद्धता कायम रक्खी दी ऐ।

<><><><><><>

NIA-Chargesheet

राश्ट्रीय जांच एजेंसी एनआईए नै बन्ने आहले जिले पुंछ च हथियार ते गोला-बरूद कन्नै जुड़ी दी आतंकवादी साजिश आहले मामले च इक पाकिस्तानी हैंडलर सने त्रै आरोपिणं खिलाफ आरोप पत्र दायर कीता ऐ। जम्मू च एनआईए दी विशेष अदालतै सामने आरोप पत्र दायर कीते गे। जिनें आरोपिणं खिलाफ आरोप पत्र दायर कीता गेआ उन्दे च अब्दुल अजीज, मुनव्वर हुसैन ते नजीर हुसैन शामिल न। प्रतिबंधित जम्मू-कश्मीर गजनवरी फोर्स नां दे आतंकवादी संगठन च कम्म करने आहला नजीर हुसैन इस्सलै पाकिस्तान दे नजैज कब्जे आहले जम्मू-कश्मीर च सक्रिय ऐ। एहदे पर कथित तौर पर आरोप ऐ जे एह मुकामी लोकें गी हिंसा ते हथियारें दी सप्लाई लेई उक्सांदा हा। अक्तूबर 2024 च अजीज थवां ग्रेनेड बरामद होए हे ते एह मामला ओदे गै सरबन्धै च ऐ।

<><><><><><>

Nitin Gadkari

सिडक, ट्रांसपोर्ट ते जरनैली सिडकें सरबन्धी केन्द्री मंत्री नितिन गडकरी होरें देशै दे बुनियादी ढांचे दे विकास दे महत्वै पर जोर दिता ऐ। उंनं हर रोज 100 किलोमीटर जरनैली सिडकें दे निर्माण दा लक्ष्य रक्खेआ ऐ। अखिल भारती प्रबंधन संघ - ए.आई.एम.ए. दे 10में राश्ट्री नेतृत्व सम्मेलन गी संबोधित करदे होई श्री गडकरी होरें आखेआ जे अगले 18एं महीने दे अंदर देशै दा सिडक बुनियादी ढांचा अमरीका थमां बेहतर होई जाहगा।

<><><><><><>

CPI-March

खाने-पीने आह्लिणं चीजें दे मुल्लें च खरी मती कमी दे चलदे पिच्छले महीने भारत दी खुदरा मुद्रास्फीति घटियै 3 इशारिया 3-4 फीसद पर आई गई। सांख्यिकी ते कार्यक्रमें दी अमल-आवरी सरबन्धी मंत्रालय मूजब अगस्त, 2019 दे बाद साल-दर-साल दी बिनाह उप्पर एह सम्भनें शा घट्ट मैहगाई दर ऐ। ग्रामीण इलाकें च एह दर 3 इशारिया 2-5 फीसद ते शैह्नी

इलाकें च 3 इशारिया 4-3 फीसद रेई। मंत्रालय मूजब, मार्च म्हीने दे दरान कुल मुद्रास्फीति ते खाने-पीने आहिलएं चीजें सरबंधी मुद्रास्फीति च एहू गिरावट, मुख्य रूप कन्नै सब्जियें, अंडें, दालें, मांस ते मच्छी, अन्न-दाने ते दुध्दे सरबंधी उत्पादें दी कीमतें च गिरावट दे कारण दर्ज कीती गेई ऐ।

<><><><><><>

Tawi-Aarti

जम्मू म्युनिसिपल कार्पोरेशन तवी दे कंडे पर तवी आरती गी नियमित तौर पर करोआने दी योजना बना रदी ऐ। खास करी औंदी अमरनाथ जी दी जात्तरा दे मद्देनजर एहू घोषणा तवी दे कंडे बूटे लाने आहली इक मुहिम दौरान कीती गेई। एहूदे च अफसरें स्वयं सेविणें ते मुकामी बसनीकें दी बड़ी मती सक्रिय शमूलियत दिक्खी गेई। जेएमसी दे आयुक्त देवांश यादव होरें आखेआ जे इस जत्त दा मकसद शैहर च आध्यात्मिक माहौल ते धार्मिक सैलसफा गी बढ़ावा देना ऐ।

<><><><><><>